

Amaqqut illersugaanerat piniagaanerallu pillugit Namminersorlutik Oqartussat nalu-naarutaat

Piniarneq aallaaniarnerlu pillugit Inatsisartut inatsisaanni nr. 12, 29. oktober 1999-imeersumi § 2, imm. 4, § 8, § 9, § 11, § 12, § 13, imm. 2 aamma 3, § 17, imm. 2, § 18 kiisalu § 21 kingullermik Inatsisartut inatsisaat nr. 1, 16. maj 2008-meersukkut allanngortinnejartoq aamma pinnigortitamik illersuineq pillugu Inatsisartut inatsisaanni nr. 29, 18. december 2003-meersumi § 5, § 6, § 35, § 36 kiisalu § 60, imm. 2 naapertorlugit aamma Piniarneq pillugu Siunnersuisoqatigiit tusarniarneqareernerata kingorna aalajangersarneqarput:

Atuuffik aamma nassuaatit

§ 1. Nalunaarut manna Kalaallit Nunaanni issittumi amaqqut (*Canis Lupus Arctos*) illersugaanerannut piniagaanerannullu atuuppoq.

Imm. 2. Nalunaarummi matumani issittumi amaqqut matuma kingorna amaqunik taagorneqassapput.

Imm. 3. Aqutsiveqarfiiit siornatigut kommuniusimasutut paasineqassapput, llanngussaq 1 aamma 2 takukkit.

Imm. 4. Pisassiissutit amerlanerpaaaffissaat amaqqut pisarineqaqqusaasut amerlanerpaaaffissaattut paasineqassaaq.

Eqqissisimatitsineq, piniarneq, pisineq aamma tunisineq

§ 2. Amaqqut Kalaallit Nunaanni eqqissisimatitaapput, taamaattoq imm. 2 takujuk.

Imm. 2. Amaqqut aqutsiveqarfinni Qaanaami aamma Ittoqqortoormiini atuuttumik inuussutissarsiutigalugu piniarnermut allagartalinnit ukioq naallugu piniarneqaqqusaapput, taamaattoq § 4 takujuk.

§ 3. Amaqqup unioqqutitsinakkut pisarineqarsimasup neqaanik aamma kigutaanik ilaanilluunniit allat tuniniarnissaat, pisarinissaat imaluunniit tigunissaat inerteqqutaavoq.

Amarorniarnissamut pisassiissutit amerlanerpaaaffissaannik aalajangiineq

§ 4. Naalakkersuisut amarorniarnissamut pisassiissutit amerlanerpaaaffissaannik ukiumi ataatsimi imaluunniit ukiuni arlalinni atuuttunik aalajangiisinnapput.

Imm. 2. Pisassiissutit amerlanerpaaaffissaannik aalajangiinermi makku eqqarsaatigineqassapput:

1) Piniakkat neqimik pilersuinissamut pingaaruteqartut illorsorneqarnissaat amaqqunillu

akornusersorneqarnerisa minnerpaaffinngortinnissaat.

2) Piniartut atuisullu ilisimasaat.

3) Pinngortitaleriffimmuit uumassusililerinermik siunnersuineq.

4) Nunat assigiinngitsut akornanni amaqqt piujaannarnissaat piaqqioqqinnissaallu pillugit isumaqatigiissutit.

5) Inuit aamma pigisat illersorneqarnissaat.

Imm. 3. Pisassiissutit amerlanerpaaffissaannik aalajangiineq pillugu Piniarneq pillugu Siunnersuisoqatigiit, kommunit sunnerneqartut aamma kattuffit attuumassuteqartut tusarniarneqassapput, imm. 1 aamma 2 takukkit.

Imm. 4. Pisassiissutit amerlanerpaaffissaat aalajangerneqartut tusagassiorfinnut nalunaaruteqarnikkut aamma Namminersorlutik Oqartussat nittartagaani nalunaarutigineqartassapput.

Piniariaatsit

§ 5. Amaqqunik piniarnermi taamaallaat qoorortuut atorneqaqqusaapput, sulloqqortussutsillu akuerisat minnerpaaffiat .222-iuvoq.

Imm. 2. Qoorortuut eqiinnartakkat eqittaannartakkallu atornissaat inerteqquaavoq.

Imm. 3. Qoorortooq sunaluunniit imm. 1 malillugu amaqqunik piniarnermut atoqquasaasoq nakersarneqarsimassaaq paarilluugaassallunilu.

§ 6. Toqunartut, nammineq seqqortussiat, kiisartut, nigarsiniutit amaqqunilluunniit uninngatitsinissamut atortut tekniskiusut allat atornissaat inerteqquaavoq.

Assartutinik motoorilinnik atuineq

§ 7. Timmisartut, qulimiguullit imaluunniit qamutit motoorillit, soorlu qamuteralaat aamma ATV-t, amaqqunik piniarnermut malersuinermullu atornissaat inerteqquaavoq.

Amaqqumik pissatamik toqtsineq

§ 8. Amaroq pissanneqarpat piniartup pisussaaffigaa piaernerpaamik taassuminnga toqtsinissani.

Imm. 2. Amaroq pissanneqartoq toqunneqanngippat piniartup piniarnerup naammassineqarnerata kinguninnguatigut Aalisarnermut, Piniarnermut Nunalerinermullu Naalakkersuisoqarfimmuit imaluunniit KANUAANA-mi sumiiffimmi piniarnermut nakkutilliisumut tamanna nalunaarutigissavaa.

Imm. 3. Amaqqumik pissanneqartumik takunnittoqarpat sapinngisamik toqunneqassaaq kingornalu Aalisarnermut, Piniarnermut Nunalerinermullu Naalakkersuisoqarfimmuit imaluunniit KANUAANA-mi sumiiffimmi piniarnermik nakkutilliisumut nalunaarutigineqassaaq.

Amaqqumik toqungasumik takunninneaq

§ 9. Amaqqumik toqungasumik takunnittoqarpat nikisinnagu qimanneqassaaq kingornalu Aalisarnermut, Piniarnermut Nunalerinermullu Naalakkersuisoqarfimmuit imaluunniit KANUAANAMI-mi sumiiffimmi

piniarnermik nakkutilliisumut nalunaarutigineqassaaq.

Kommunimi ileqqoreqqusat

§ 10. Kommunalbestyrelsi kommunimi ileqqoreqqusaliornikkut malittarisassanik aalajangiisinnavaoq kiisalu kommunip iluani nunaminertani aalajangersimasuni amarorniarnermut najoqqtassaliorsinnaalluni, § 2, imm. 2, takuuq.

Imm. 2. Kommunimi ileqqoreqqusaq, imm. 1 takuuq, Aalisarnermut, Piniarnermut Nunalerinermullu Naalakkersuisumit atuutilersinnejqassaaq.

Pisanik nalunaaruteqartarneq

§ 11. Amaqqut pisarineqartut pissatarineqartullu tamarmik pisaqarnermik nalunaarut immersugassaq atorlugu nalunaarutigineqassapput, ilanngussaq 3 takujuk, taannalu pisaqarnerup kingusinnerpaamik ullut 14-it qaangiunneranni kommuni aqqutigalugu Aalisarnermut, Piniarnermut Nunalerinermullu Naalakkersuisoqarfimmut nassiunnejqassallutik.

Imm. 2. Amaqqut pisarineqartut pissatarineqartullu tamarmik aammattaaq PINIARNEQ-mi ukiumoortumik immersugassaq atorlugu imaluunniit www.sullissivik.gl -mi ukiumoortumik nalunaarutigineqassapput.

Imm. 3. Pisaq normalalimmik nalunaqutsiussaqarsimappat imaluunniit radiukkut aallakaatitsissuteqarsimappat kommuni aqqutigalugu pisaqarnermik immersukkamut ilanngullugu Aalisarnermut, Piniarnermut Nunalerinermullu Naalakkersuisoqarfimmut nassiunnejqassaaq.

Allatut ajornartumik iliortariaqarneq imaluunniit imminut illersortariaqarneq

§ 12. Kalaallit Nunaanni pinerluttulerinermi inatsimmi maleduagassat malillugit amaroq allatut ajornartumik iliortariaqarnermi imaluunniit imminut illersortariaqarnermi toqunnejqarpat amarortaq tamarmi Namminersorlutik Oqartussanut pigisassangortinneqassaaq.

Imm. 2. Amaqqumik toqutsisup toqutsinerup kingusinnerpaamik ullut marluk qaangiunneranni Aalisarnermut, Piniarnermut Nunalerinermullu Naalakkersuisoqarfimmut tamanna nalunaarutigissavaa. Naalakkersuisoqarfik pisoq pillugu allaganngorlugu nassuaasiussaaq pisaqarfik, piffissaq aamma toqutsinermi pissutsit sukumiinerusut ilanngullugit.

Imm. 3. Aalisarnermut, Piniarnermut Nunalerinermullu Naalakkersuisoqarfik amaqqt inoqarfinnunut qaninngoortut imaluunniit inoqarfinnukartut pillugit allaganngorlugin maleruagassanik atuutilersitsissaaq.

Nalunaqutsiineq, eqqussineq, annissineq aamma uumasuuteqarneq

§ 13. Amaqqunik nikinnaveersitsineq nalunaqqutsiinerlu Aalisarnermut, Piniarnermut Nunalerinermullu Naalakkersuisoqarfikup akuersissuteqarneratigut aatsaat pisinnaavoq.

Imm. 2. Amaqqut, tassunga ilanngullugit amaqqt piarai, uumasuutigineqaaqquaanngillat.

§ 14. Amaqqut uumasut imaluunniit toqungasut taakkualuunniit ilaat eqquteeqqaanngillat anniseqquaanatillu, CITES Allattuiffik I takujuk – Convention on International Trade in Endangered Species.

Immikkut akuersissuteqarneq aamma uumassusililerinikkut misissuinerit

§ 15. Aalisarnermut, Piniarnermut Nunalerinermullu Naalakkersuisoqarfip ilisimatusarnermut imaluunniit Kalaallit Nunaata piniagassatigut pisuussutaasa nalunaarsorneqarnerannut atatillugu nalunaarummi malittarisassaniit immikkut akuersissuteqarsinnaavoq.

§ 16. Aalisarnermut, Piniarnermut Nunalerinermullu Naalakkersuisoqarfik amarorniarsinnaanermut atatillugu uumassusililerinikkut misissuinernut atugassanik amaqcup ilaanik tunniussisarnissamut piumasaqaatinik aalajangersaasinnaavoq.

Pineqaatissiissutit

§ 17. Nalunaarummi matumani § 2-mik, imm. 1, § 3-mik, § 4-mik, imm. 1, § 5-imik, § 6-imik, § 7-imik, § 8-mik, § 10-mik, imm. 1, 2 aamma 3, § 12-imik, imm. 1 aamma 2, § 13-imik kiisalu § 14-imik unioqqutitsinerit Kalaallit Nunaanni pinerluttulerinermi inatsimmi maleruagassat malillugit akiliisitsisummik kiisalu piniutinik inatsisinik unioqqutitsisumik atorneqarsimasunik pisanillu arsaarinninnermik kinguneqarsinnaapput.

Imm. 2. Imm. 1 malillugu suliat Nunatsinni Eqqartuussivimmi suliassanngortinnejassapput.

Imm. 3. Akiliisitsinerit imm. 1 malillugu aalajangersarneqartut Nunatta Karsianut nakkartinneqassapput.

Atuutilersitsineq

§ 18. Nalunaarut manna 12. september 2020-mi atuutilerpoq.

Imm. 2. Peqtigalugu Amaqqut Kalaallit Nunaanni eqqissisimatinneqarnissaat pillugu Namminersornerullutik Oqartussat nalunaarutaat nr. 9, 5. maj 1988-imeersoq atorunnaarsinneqarpoq.

Namminersorlutik Oqartussat, ulloq 11. september 2020

Jens Immanuelsen

/

Jørgen Isak Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut